

KOROSO Paoro Iokanatsopatakiti Koroso Auakanimoni

¹ Nota Paoro. Niokanatsopata hitemoni. Teoso mereëno nota, kotxi inirekari nota Xesosi Kristo iokanatakiti nininiua. Aïtari Tximótxio apaka iokanapireta hitemoni. ² Ininiã aiokanataria ia iökatsopari Teoso nakitiakorimoni, ikinika Teoso paniãtakiti kamakanimoni Koroso sitatxiti auakanimoni. Aïtariakori hïtxaua. Aïri Teoso, Apiananiri Xesosi Kristo pakini sikari ikinipoko erekari hitemoni. Ninoa kamaerekaxiniretai hïte.

Teoso Misãkiretiko Koroso Auakani İkapani

³ “Erekapitikai,” atxari Teoso, aãuïte Xesosi Kristo iri, iua amisãkiretakasaaki hïte İkapani. Ätipirika amisãkiretari Teoso hïte İkapani. ⁴ Ikara atoko atxari Teoso, kotxi ate kenakopiretari hïte auikiniri Kristo Xesosi säkire. Apaka akenakopiretari hïte tiretiniri ikinika kãkiti Teoso nakitiakori. ⁵ Teoso iokanapirena erekari atão säkiretxiti itxaua. Ikara hïkenakotakasaaki, hïkenakotari Teoso sikaenetakiti ipotetakiti itixineë hïte İkapani, ininiã hiãtapari hãpakapiniri Teoso sikaenetakiti. Himarotari hãpakapiniri, ininiã Teoso säkire hãuikini aua, hïtiraõkiuatini pakini aua. ⁶ Teoso iokanapirena erekari hïkenakotakiti iaripiretapeka ikini itixitimoni. Ikiniõtika apikomoni kãkiti kenakotari. Iuasaaki kãkiti auikaãpotari Teoso iokanapirena. Ikiniõtika kãkiti apakapari erekari Teoso sikakiti. Iua atokokana hïte kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atão sikiniri ikinipoko erekari kãkitimoni.

⁷ Amoianari, atiretakiti, Epápara inakori, iuara oerekai Teoso sikiniri ikinipoko erekari kãkitimoni. Iua Kristo nitiri itxaua. Ātipirika iparĩkauata Kristo ĩkapani, ininiã ātipirika iparĩkauata hĩte ĩkapani. ⁸ Iua sãpiretaua ate hĩtiraõki, Erekaru Matamatakoti siãkiti hĩtemoni.

⁹ Hĩte pirena akenakopiretakasaaki, ātipirika amisãkiretari Teoso hĩte ĩkapani. Ate nirekari hĩte iteene imarotiniri Teoso nireẽkiti hĩkamini ĩkapani. Anirekari kĩkiteni hininiãua. Anirekari himarotiniri Teoso imarore Erekaru Matamatakoti siãkiti.

¹⁰ Ininiã ate misãkiretari Teoso hĩte atão hĩkamini ikiniõtika, kotxi Apiananiri anaakori hĩtxaua. Anirekari hĩkamakiti kamapoxokonitiniri Teoso. Ininiã hĩkamakiti ikiniõtika erekarinoka, amãtiiri erekari atoko. Ininiã ikiniõtika himaroãpotari apikomoni Teoso nireẽkiti.

¹¹ Anirekari Teoso sikataparaxiniretinii hĩte iposotiireẽ, kotxi kaposotiireri iua. Ininiã iuasaaki hiãtapari himisiritiko xipokini. Iuasaaki !hinaiataua. Iuasaaki hĩposotari himĩteenekiniri himisiritiko hĩpoxokoniritika.

¹² Iuasaaki hĩtxariko aĩri: “Erekapitikai,” kotxi iua kamaerekataua. Ininiã aãpakapari iua potetakiti inakitiakori ĩkapani Teoso tixineẽ, ipiã mauakaniãtaã.

¹³ Iua sikakaua ipiã posotiireẽ aãuakasaaki, maerekati posotiireẽ aãuakasaaki. Iua anikaua imi itiretakiti auiniãtaã. Iuaãtaã auakani auĩte itxaua imi. ¹⁴ Imi Kristo ĩkitxitari Teoso amaerekani ĩki ipĩkasaaki, ininiã Teoso makatxakari amaerekani. !Ixnikaikari amaerekani.

Kristo Apiananiri

¹⁵ Kãkiti kona posotari atamatiniri Teoso. Teosotxikana itxaua Kristo, iuaritika aposotari Kristo aãtamadini. Ikinipoko kamiko apisa, Kristo aua Teosokata. ¹⁶ Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kãkiti atamatakiti,

kākiti matamatakiniti apaka. Ikamari ikinika kaposotirerini, auītetxiakori matamatakoni, ikinika Teoso niritiakori pakini. Ikamari ikinika. Ikinika kamaāka iua ĩkapani. ¹⁷ Kristo aua ikinipoko apisa. Iua maĩkari ikinika imaxipokakani ĩkapani. Ikara atoko ininiā, ikinipoko auapanika. Iua mauakaniā, ikinika iarika. Iua mauakaniā, ikinipoko xipoka.

¹⁸ Kākiti Teoso mereēkini Kristo ĩto atoko itxauana. Teoso mereēkini kii atoko itxa Kristo. Merepitipanika ipĩkari ōkitikakariua iua. Ininiā ōkitikasaakua, oerekari kākiti Apiananiri ininiua. Āti kaposotiireri iua atokokana inakari !auari. ¹⁹ Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰ Kristo arēka xiketakasaaki aamina ĩpiriāmitakari nopini, iusaaki Kristo xipokari Teoso omanākarauatini kākiti maerekani xika. Kotxi Teoso nirekari Kristo mininiri ikinipoko iuaĩkana iuamoni, ĩkorapokoriti auakani, iaxiti auakani pakini. Ininiā uatxa Teoso apakapari Kristo sākire auiākani.

Kristo Kamakiti Koroso Auakani ĩkapani

²¹ Hĩtepekana, mitxi !himarotari Teoso. Iusaaki ! hāuari Teosokata. Maerekati hĩkamakiti xika homanatarari Teoso hāxixinireē. Teoso mokaiakariakori hĩtxaua iusaaki. Uatxa Teoso apakapai hĩte, ²² kotxi Kristo ĩto ipina hĩte ĩkapani. Ininiā iua anikai hĩte Teosomoni iua makatxakakini hininiua ĩkapani. Teosomoni himaerekani !auaika, kotxi Kristo makatxakapekari imakinika himaerekani. Teoso apisatoō hāpokasaaki, kona āti posotari apoĩtinii himaerekani xika. ²³ Ikara atoko aua hĩte-moni, iteene hāuikiniāri Kristo sākire ikiniōtika, Kristo sākirenoka hāuikiniā, isākire himatakanapakaniā. Ikara atoko hĩkaminiā, apanakini kona txĩkitakai hĩtakanapiniri hiātapiniri ikinika Teoso kamakiti hĩte ĩkapani.

Teoso iokanapirena erekari sãpiretaua ikinika Teoso kamakiti inakitiakori ïkapani. Hïte kenakotapekari Teoso iokanapirena erekari. Isãpiretaãkapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisãpiretini ïkapani.

Paoro Parïkauata Kãkiti Teoso Mereëkini ïkapani

²⁴ Uatxa nipoxokoniuaata hïte ïkapani natatsiirauatini, kotxi natatsiirauatini xika hïte auikari Kristo sãkire. Natatsiirauata niïtoã Teoso mereëkini ïkapani. Kristo ïto atoko itxauana kãkiti Teoso mereëkini. Natatsiirauat-
apitika, iuaritika Kristo atatsiirauatini apiata. ²⁵ Teoso iokanatano nota imereëkini nitiri nininiua. Ipaniãtano nisãpiretiniri ikinika isãkire hïtemoni. ²⁶ Ipaniãtano nisãpiretinii mitxi kãkiti mimarotakiniti. Okananipeka Teoso loerekari ikara kãkiti mimarotakiniti. Kristo ipinini apisa ikini itixiti auakani !imarotari ikara. Mitxi kãkiti mimarotakiniti uatxa oerekaãka Teoso nakitiakorimoni. ²⁷ Uatxa Teoso nirekari inakitiakori Xoteo minakanuia imarotiniri mitxi kãkiti mimarotakiniti, kotxi peerekari. Natokopa itxa ikara kãkiti mimarotakiniti? Nisãpiretai. Kristo posotari kãkiti ãkixinireë auini. Ia mitxi kãkiti mimarotakiniti. Kristo aua hãkixinireë. Ininiã himarotari hïsinì Teoso tixinemoni. ²⁸ Ininiã asãpiretari kãkiti Kristo pirena. Aõãkikari ikinimane Teoso imaroreë. Aõerekari ikinimane Teoso imaroreë, kotxi Teoso sikaimaroretua. Iua aua ikinika imaroretxi. Ikara atoko aanikana Kristo nireëkitinoka kamakani Teosomoni. ²⁹ Ikara nikamini ïkapani, niparïkauatapitipo. Pasãpaniri. Kristo posotiireë niparïkauata, kotxi kaposotiireri iua. Iua iteene sikataparatarì nãkixinire, ininiã niposotari iteene niparïkauatini iua ïkapani.

2

Paoro Nirekakiti

¹ Ninirekari himarotniri iteene nimisirritiko hïte ïkapani. Apaka iteene nimisiritaãka Araotxiséia sitatxiti auakani ïkapani. Nimsiritaãka apanakini nimataõkitakini ïkapani apaka. ² Ninirekari ikinimane ninoa kataparaxinire ininina. Apaka ninirekana itiretakiniuana, ininiã ätika ninoa nireëkiti. Ikara atoko ininiãna, iteene imarotarina ikinika Teoso säkire. Iuasaaki imarotarina Kristo, mitxi kãkiti mimarotakiniti, mitxi aïri Teoso morekakiniti. ³ Paimatireri Kristo. Iua mimarotakiniti ! auari. Ikinipoko imarota. ⁴ Ikara atoko nisãpiretai hïte, apanakini mamsirienetakanii tïkane kãkiti imaroreë. ⁵ Niïto !auari hïtekata, iuaritika nixinikapikai hïte nãkixinireë. Nipoxokoniuaata, kotxi nimarotari hïkamakiti atão inini. Apaka nipoxokoniuaata, kotxi hïte iteene auikari Kristo säkire.

Atão Kristo Säkire Auiãkani Kamakiti

⁶ Hãpakapapekari Kristo Xesosi hãuïte ininiuã ïkapani, ininiã hïkamariko inirekakiti ikiniõtika. ⁷ Iua taparanoka hïkosekako. Aãkotsa kosekiniri ãparaã atoko hïtxako. Ikara atoko hininiã, kataparari hïxinire. Ininiã atão hãuikari Kristo säkire mitxi aõerekakiti atoko, ininiã kataparaiko. Ininiã iteene hïtxariko Teoso: “Ikinika pikamakiti ate ïkapani peerekari,” hïtxako.

⁸ Erepaniko. Kona hãuiritapiri kãkiti makatxakinii Teoso kimaporeë. !Hãuikapiri ninoa säkire, kotxi ätião ninoa säkire. Na atão isäkirena. Kãkiti imarorenoka imarotana. Kamisirienererini ninoa. Maxikatïika isãkirauatana. Kitxakapirïka auakani säpiretakiti ninoa säkire. ïkorapokoriti auakani nireëkiti maerekati isãpiretana kãkiti. Kona Kristo säkireni.

Apiananiri Itxaua Kristo

⁹ Kristo aua iïto, iuaritika Teosotxikana iua. Kristo aua ikinipoko Teoso posotiïre, ikinipoko itiraõki, ikinipoko imarore, txaãpokata, kotxi Teoso itxaua. ¹⁰ Kristo aua

hākixinireē, ininiā ikinipoko aua hītemoni. !Auari apikomoni hinirekakiti, kotxi auītetxiakori iaxiti auakani auīte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hīte ĩkapani

¹¹ Hāpakapapekari Teoso takaōtxikare kākiti mataākiniti. Hākixinireē Teoso takari itakaōtxikare. Kristo makatxakasaakiri himaerekani hīto nireēkiti, iuasaaki hāpakapari Teoso takaōtxikare.

¹² Hīpatxisatikosaaki, Kristokata ikatakoni atoko hītxaua. Eereka hōkitikaāka Kristo ōkitikiko atoko. Hīte ōkitikaākako, kotxi hīte auikari Teoso posotiire Kristo ōkitikini ipikasaaki.

¹³ Mitxi ipīkani atoko hītxaua himaerekani xika. Xoteo minakanuia hīte, ininiā mitxi kona himarotari Teoso nireēkiti. Hīponaniākasaaki, maerekati auape hītemoni. Iuaritika Teoso txīkitakai auāki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴ Iua oakari iōkatsopatakori amaerekani sāpiretiko. Ikara iōkatsopatakori sāpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iōkatsopatakori. Imakatxakari ikara iōkatsopatakori. ĩpiriāmitakari nopini Kristo tokakitikosaaki, ikara iōkatsopatakori tokakitaāka apaka iuaā, ininiā !itxaika. Iuasaaki amisiritiko !auaika. ¹⁵ Kristo ĩpiriāmitakari nopini ipīkasaaki, iuasaaki imakatxakari ikinika Satanasi posotiire, initiriakori posotiire pakini. Iua oerekari ikinimane !kaposotiirena ninoa. Iua ōkitikasaakiaua, oerekari ikinimane iuananira Apiananiri ininiua. Iuasaaki Kristo oerekari ikinimane ikāiatini.

¹⁶ Ininiā kona hāuiritapiri apanakini txitinii hinikakiti xika, hiātakiti xika pakini. Kona hāuiritapiri apanakini txitinii kiiniri Teoso ĩkapani hīkamini xika, kiiniri kasiri

itopaītakasaaki hīkamini xika, kiiniri tomatiko ōti hīkamakiti xika pakini. ¹⁷ Kiiniri Teoso īkapani īkorasaaki sanōkatxi atoko itxa. Oerekaua atāo inakari, txamari na iteene oerekaua. Iteene oerekaāka atemoni, Kristo aōkitakasaaki. ¹⁸ Erepaniko kākiti ia atoko inakari: Ninoa iuikari imiukakaniuana. Ninoa teosonetari Teoso nitiriakori matamatakoni. Ninoa sāpiretari kākiti matamatakoni aōkitinina itaponeēna. Ixinikarina ninoaka nireēkitinoka. Ixinikarina kimarorerini ininiana, ininiā iukauana. Erepaniko kākiti ikara atoko inakani. Hāuikiniāri ninoa sākire, !auaika hīparīka īki. ¹⁹ Kākiti ikara atoko inakani !inirekari Kristo iauītena ininua. Kotxi Kristo akii atoko itxa. Ate iua īto atoko atxaua. Ikara atoko ininiā, isikataparataua. Aāpotiitaua. Asikataparatakakaua. Ātika ītotxi atoko atxaua. Ikara atoko aniniā, aimaroāpotari isākire. Aaneē, kākiti īto aneini atoko.

Apinini, Aūuini Pakini Kristokata

²⁰ Mitxi hinireēkiti itixi auakani nireēkiti atoko. Hāuikasaakiri Kristo sākire, mitxi hinireēkiti !auaika. Ipīpe. Txamari hīkamapanikari īkorapokoriti auakani kamakiti atoko. Ninoa nireēkiti iaōka hīkamapanika. ²¹ Ninoa txari: “Kona pimaīkapiri ikara. Kona pinikapiri ikara nipokori. Kona piouātakapiri ikara.” Kinirepa hīkīpitari ikara isākirena? ²² Ninoa paniātakiti xipokapitikako. Ikara atoko !itxa, kotxi ikara atoko inakari paniātakori kākيتينoka paniātakiti. Kākiti oerekakiti sākiretxitinoka ikara. ²³ Kākiti uākatari ninoa paniātakiti kimarorerini paniātakiti atoko. Ninoa xinikakiti iaōka inirekarina Teoso. “!Erekanu,” itxana, txamari ākixinireēna itxana “Peerekanu.” Ninoaka misiritaua iītoāna. Ikamarina ikinika iītona nireēkiti.

3

Atāo Hīkamakiti Erekarī Hāuini Īkapani

¹ Hīte ōkitikaāka Kristokata hāuini amaneri inini ikapani, ininiā hinirekariko hīkaminiri Teoso tixine auakani kamakiti iaōka. Iuaā Kristo topākanāta Teoso kikomoni. Apiananiri itxaua Teoso kikomoni topākakari.

² Hīxinikariko Teoso tixine. Kona hīxinikapiri ikorapokoriti. ³ Ipīkani atokopeka hītixa, kotxi hāuini kitxakari !auaika, ininiā kona hīxinikaikari ikorapokoriti auakari. Teoso sākire mauīākani !imarotari hāuini amaneri Kristokata Teoso auiniātaā. ⁴ Kristo txīkitakari aāuini amaneri inini. Iua uai apokasaaki iuaikana atamataāka. Iuasaaki hīte apaka atamataāka iuakata. Iuasaaki hītemoni auari Kristo iotximere atokokana.

⁵ Hīxipokariko hīito nireēkiti, kotxi ikorapokoriti auakari nirekari itotxi nireēkitinoka. Hōkariko. Kipa aua aāixinireē aōkini ikapani? Auari anokaretxi. Auari āito nireēkitinoka kamiko nirekiko. Auari āti ito nirekiko. Apaka auari āti nakiti nirekiko aākixinireē. Iteene anirekiniāri āti nakiti, ateosone atoko itxaua anireēkiti.

⁶ Ikara maerekati xika, Teoso omanākare apokapitikako Teoso paniātakiti makīpitakanimoni. ⁷ Mitxi hīte kamari maerekati ikara atoko inakari. Iuasaaki hītoapekari ikara atoko inakari hīkamini. ⁸ Uatxa ia atoko inakari hītakanapako: omanākaretxi, āti iteene txitiko, Teoso misākirepiretiko, maerekati sākiretxiti pakini.

⁹ Kona himisirienetakapeua, kotxi hītakanapapekari maerekati mitxi hīkamakiti. Himāka kitxakari hōkini atoko, hītakanapapekari ikara maerekati.

¹⁰ Uatxa hīkamakiti amaneri. Himāka amaneri hīretakini atoko, hīkamakiti uatxa amaneri. Teoso txīkitakari hīkamakiti amaneri inini, ininiā himarotari atāo inakari imaroretxi. Ininiā Teoso kamakiti atokokana hīkama, kotxi hīte kamakari itxaua. ¹¹ Uatxa kākiti apiari !auari. Krekoakori, Xoteoakori, Teoso takaōtxikare auaitotakini, Teoso takaōtxikare mauaitotakini, mimaroreni, kākiti itopa auakani, nitiritxi amotakoni, kākiti miamotakoni

pakini !auari kākiti apiari. Āti kākiti āti kākītixikana, kotxi Kristonoka Apiananiri. Iua aua ikinimane isākire auiākani ākixinireē.

¹² Ininiākara hiamonīkariko āti. Hīkamariko erekari ātimoni. !Hīuikapeua. Kaneenama !hītxape. !Kattimari homanākarauatini. Ikara atoko hāuako, kotxi Teoso mereēkini, iua nakitiakori, itiretakini hītxaua. ¹³ Himiteenekakakauako. Himaxinīkaretariko apanakini kamakiti, hīte mapokaerekatakiniti. Kristo maxinīkaretapekari maerekati hīte kamakiti, ininiā iua atokotxikana himaxinīkaretariko maerekati apanakini kamakiti hītemoni. ¹⁴ Ikara erekari hīkamako. Erekari apiari hīkamini, hītiraōkiuatini. Hītiraōkiuatako. Hītiraōkiuatakasaaki, ininiā iusaaki ikinika hīkamakiti atāo.

¹⁵ Kristo kamaerekaxiniretai, ininiā erekari hākixinire. Hāuiritariko ikara erekari kaikotini. !Hīkamapiri ikara erekari makatxakiko īkapani. Hīkinika ātika itotxi atoko hītxaua. Teoso akiritai hīte hākixinire ereka inini īkapani. Hītchariko Teoso ātipirika: “Erekapitikari pikamakiti nota īkapani,” hītxako. ¹⁶ Hāuiritariko ikinika Kristo sākire kaikotini hākixinireē, ininiā iusaaki himarore iteene aua. Hōerekakakaua. Hōtākikakakaua. Hīxikaretari xikari Teoso īkapani. Hīxikaretariko xikari Teoso sākire iōkatsopatakori xikariti. Hīxikaretariko xikari kitxakari, amaneri pakini Teoso īkapani. Hīxikarauatakasaaki, hākixinireē hītchariko Teoso: “Erekapitikari pikamakiti nota īkapani.” ¹⁷ Ikinika hīkamakiti hīkamako Apiananiri Xesosi īkapani. Hīsākirauatakasaaki, hīsākirauata Apiananiri Xesosi īkapani. Iusaaki hītchariko aīri Teoso: “Erekapitikari pikamakiti nota īkapani,” hītchariko.

Kākiti Aapoko Auakani Ōtākikiko

¹⁸ Hīte itanorotxi, hīkīpitariko hītaniri sākire, kotxi Apiananiri nakiti hītxaua, ininiā ikara atāo hīkamini.

¹⁹ Hīte ĩtaniritxi, hītiretaroko hĩtanoro. Kona hĩtxitapero oa. Kona homanatapero.

²⁰ Hīte amarini, hĩkĩpitariko hĩri, hinoro pakini sākire. Ikinika ninoa paniātakiti hĩkamako, kotxi Teoso apokaerekatari ikara atoko inakari.

²¹ Hīte irĩtxi, kona hĩkamanaiamanetapena hamariteakori, kotxi eereka maerekaxinireti aua ninoamoni, ininiã ! inirekaikarina hīte paniātakiti ikaminina.

²² Hīte nitiritxi, hĩpatrãote ĩkorapokoriti aua, ininiã hĩkamariko ikinika ninoa paniātakiti. Apanakini iteene parĩkauata ipatrãote apisatoõ, iua apokaerekatiniri ĩkapani. Iua mauakanisaaki apaka iteene hĩparĩkauatako. ĩkini hĩxinireritika hĩkamariko hĩparĩka. Ikara atoko ininiã, atão hĩpaxitari Teoso. ²³ Ikinika hĩkamakiti hĩkamako hĩtaparaxinireritika. Hĩparĩkauatakasaaki, parĩkatxi Apiananiri ĩkapani hĩkamini atokotxikana, hĩparĩkauata kãkiti ĩkapani. ²⁴ Hĩparĩkauatako ikara atoko, kotxi himarotari Apiananiri sikinii ipotetakiti iaxitikiri hĩparĩka ĩki. Itixine hãpokasaaki, hãpakapariko. Api-ananiri Kristo nitiriakori hĩtxaua. ²⁵ Maerekati kamakari apakapariko imisiritiko. Teoso misiritari ãti maerekati kamakari, ãti maerekati kamakari imisiritini atokotxikana.

4

¹ Hīte patrão, hĩkamariko atão inakari hinitiriakori ĩkapani. Kona himisirienetapena ninoa. Kotxi hīte apaka aua hĩpatrãote Teoso tixineẽ.

Apikomoni Paoro Ōtakikakiti

² Kona hĩtakanapapiri Teoso himisãkiretini. Araõkire hĩtxako maerekati mapokakani ĩkapani. Ātipirika hĩtxariko Teoso: “Erekapitikari ikinipoko pikamakiti nota ĩkapani,” hĩtxariko iua.

³ Apaka himisākiretariko Teoso ate ĩkapani. Hamanaãriko Teoso, iua oerekiniua isãkire apanakinimoni asãpiretini ĩkapani, kotxi anirekari asãpiretiniri kãkiti Kristo pirena, mitxi kãkiti mimarotakiniti. Ikara nisãpiretini xika, kateia ãki naua.

⁴ Himisākiretariko Teoso, Kristo pirena atão nisãpiretini ĩkapani, kãkiti atão imarotini ĩkapani.

⁵ Kimarorerini hĩtxauako Teoso sãkire mauĩãkani sauaki hãuakasaaki. Aãuini poião, ininiã ikiniõtika hinitari kãkiti Teoso sãkire hĩsãpiretini ĩkapani.

⁶ Teoso sikapekai ikinipoko erekari, ininiã hĩsãki-rauatakasaaki, hõerekari kãkiti hĩsãkireẽ hĩtiretinina. Iõkira mauakaniã nipokoriã, !kaposeri. Iua atokotxikana erekari mauakaniã hĩsãkireẽ, kãkiti !inirekari ikenakotiniri hĩsãkire. Erekari hĩsãkire ininiã, himarotari hãpakapiretiniri kãkiti.

Paoro Iokanapiretini Pirena

⁷ Txĩkiko inakori sãpiretaiko ikinika nota pirena. Aĩtari, atiretakiti itxaua. Iua parĩkauatapitipo Apiananiri ĩkapani. Apiananiri nitiri itxaua atekata. ⁸ Niokanataru iua hĩtemoni, hĩte imaropiretini ĩkapani, hĩte isikata-paraxiniretini ĩkapani. ⁹ Niokanataru Onésimo inakori apaka iuakata. Koroso sitatxitikiri iua, hĩte atoko. Aĩtari atiretakiti itxaua apaka. Aĩtipirika atão iparĩkauata Kristo ĩkapani. Ninoa sãpiretaiko hĩte ikinipoko Kristo sãkire auĩãkani kamakiti uai.

¹⁰ Arisitako inakori, notakata kateia ãki auakari, xinikamanapitai hĩte. Panapee itaro ãkiri Marko, xinikamanapitai hĩte apaka. Nisãpiretapekai hĩte Marko pirena. Ininiã ereẽ iua apokasaaki, hĩpoxokoniritika hãpakapariko iua.

¹¹ Xosoee Xósito inakori xinikamanapitai hīte apaka. Ni-noa ipi āti pakini Xoteoakori notakata parīkauatakani itx-auana. Ninoa parīkauata notakata, Teoso auītetxi ininiua pirena asāpiretini ikapani. Isikataparaxiniretanona nota.

¹² Epápara inakori apaka xinikamanapitai hīte. Ereēkiri iua. Kristo nitiri itxaua. Ātipirika imisākiretari Teoso hīte ikapani, Teoso nireēkitinoka hīkamini ikapani, ikinika hīkamakiti atāonoka hīkamini ikapani. ¹³ Nota imarotari iteene iparīkauatini hīte ikapani. Apaka nimarotari iparīkauata kākiti Araotxiséia sitatxiti auakani ikapani. Apaka nimarotari iparīkauata Ierapori sitatxiti auakani ikapani.

¹⁴ Aītari atiretakiti, amianari imarotakari Arókasi inakori apaka xinikamanapitai hīte. Témasi inakori apaka xinikamanapitai hīte. ¹⁵ Hīsāpiretanako aītariakori Araotxiséia auakani nixinikinina ninoa. Hīsāpiretaroko Nīpa inakoro, Teoso mereēkini oaāpoko apotiitakaniua pakini, nixinikinina ninoa. ¹⁶ Ia niokanatsopatakiti hātatsopatakoti hīkinika hīkenakotini ikapani, eereka hīpaniātari atatsopatikoti Araotxiséia sitatxitiā, Kristo sākire auīākani kenakotiniri ikapani. Apaka hīte atatsopatariko Araotxiséia auakani iokanatsopatakiti. ¹⁷ Hītchariko Akipo inakori: “Pikamariko ikinipoko parīkatxi Apiananiri paniātakiti pikamini.” ¹⁸ Nota Paoro niōkatsopataria ia niuakoā: Hīxinikariko kateia āki nauini. Teoso sikari ikinipoko erekari hītemoni. Amē.

Teoso sãkire ameneri New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 19 Oct 2021 from source files dated 19 Oct 2021

253eaec7-f0c7-5b49-b6be-65ee5354d0ed